

摘藻堂四庫全書薈要

集部

欽定四庫全書薈要卷二萬五百四十五

集部

明詩綜卷七十二

翰林院檢討朱彝尊編

魏學洙 十六首

學洙字子敬嘉善人贈太常卿大中子鄉人私謚孝烈先生有茆簷集

靜志居詩話魏忠節公被逮日天大雷電子敬徒跣攀號請隨行公語之曰覆巢豈有完卵父子並死無益也子敬乃微服緹騎後探起居抵國門邏卒四布乃變姓名匿都市營救不可得

公既斃獄扶櫬歸朝夕躡踊未嘗一入寢室淚盡脣焦家人捧水漿以進却之曰吾父詔獄中孰夜半而進之漿者病且革進以藥則又却之曰吾父詔獄中孰診視而進之藥者歷數旬而哀毀死矣思陵即昨朝士上聞於朝以是海內稱為孝子大學士同里錢公士升序其集云子敬之志父存則不獨死父死則不獨生是誠孝子之知已矣當甲子秋忠節掌吏垣以激濁揚清為已任天下仰望太平子敬獨私憂之歎曰無根之草其能久乎物不可以終通天殆蘊隆正人之毒而速之感也未暮而禍作人服其識

猛虎行

北山有猛虎不牝亦不牡哀哀無辜人吞噬十而九猛

虎且勿道蝨乃伏其尻壯士困顛躓蝨喙紛相撓為語
行路人且復忍此蝨撲蝨誤驚虎滅影苦無術虎頭置
短枕虎皮罩塵埃猛虎有死日蝨乎何有哉

長水怨

為友人
妾賦

妾家住長水長水東西流青青湖畔柳迢迢湖上樓十
三學釵書十四工瑩篔十五臨窻繡精妙世無儔翩翩
少年子窈窕行相求借問樓上女可似羅敷不里姬前
致辭願君且淹留美人好顏色終日樓上頭兼之臨窻

繡精妙世無儔君子謬垂盼聞言中心喜語我長者行
同聲謂應爾郎君美風度玉樹蒹葭倚十九渡長江聲
名若江水好花不獨榮天生合連理行行隨君去默默
思故里牽帷幾回喚低眉羞欲死臨鏡貼花鈿可憐體
無比紗窻春日午脈脈情何已憶我在家時拈香繡大
士金刀剪素綾瑩瑩白於紙刺成蓮花葉彷彿香風吹
香風吹入夢夢到蓮花池繡痕細難識但覺生蛾眉靜
玩坐逾久忽忽心自疑似曾親見佛不知身是誰綾額

尚餘尺皚皚冰雪姿淡濡碧玉毫邀郎為題詩郎書擬
右軍妾心亦委婉鍼鋒與筆意曲折隨郎轉繡罷持似
君秀色堪舒卷顧我每微笑妾顏先自靦落地為女子
可憐側室難陡然一回想心事慘不歡雖復蒙君憐鮫
綃恒不乾大婦貴家女妾身臧獲看上堂伺音聲下堂
候顏色含羞入空房惻惻潛相憶雖然潛相憶無用長
太息誠得君子懽不怨長離隔大婦奄逝世一家身獨
當漂蕩若浮萍隨君流四方南都復北都終歲長道旁

黃金散欲盡不思歸故鄉壯志在四海妾心暗悲傷君
怯不勝衣年來益憔悴十日九卧病奄奄滯旅次妾首
如飛蓬并日忘食事上無姑嫜親下無得力婢旋出又
旋入常恐呼不至憂勞填胸臆刺刺肝腸碎歲月漸消
耗妾身亦不支帶圍日趨緩空復存腰肢事君垂十載
不一生男兒羞佩宜男草悵然心中悲君嘗兩畜婢中
道旋棄之妾身非不容君自輕別離暮春三月盡束裝
謀南歸買舟僅如葉帷幕不得施長夜泊豐草巨蚊攢

冰肌生小長閨閣辛苦實難為入秋弛行李僦人樓上
居小姑家海濱聞之亦來依雖非久居計氣息聊得舒
良人忽生心娶婦支門閨隋珠飾翠幃黃金飾綺疏紅
羅複斗帳寶馬七香車今日媒妁來東鄰有美姝明日
媒妁來西家有西施妾身非木石焉得不孤悽對鏡影
如削安敢生言辭禮數任頡頏難比先孃時新人入門
來灼灼豔威儀二九頗不足二八頗有餘女伴覩鸞幃
嘖嘖相嗟咨君心愛幸絕迴與舊人殊非必顏色殊新

舊自相渝新人哭亦妍舊人笑不如孤房過慰藉眇昧
聊斯須情知心不存詞說空爾為新昏浹旬日忽作南
都遊俗語莫空房挽衣不能留新人暫歸寧登車去由
由妾身姊為母同君亦登舟耳縮雙明月墮髻垂金塗
飄飄蕩湘裙色如安石榴輕盈作纖步翩若雲端游鄰
女相擁簇朱顏自生羞十年方得歸一喜還一愁顧君
色悽慘何用心恻恻莫非眷新昏懷此離索憂千喚不
一答默默自低頭舟行到長水妾自還家裏親戚往邀

君君固不肯起詰朝云解維舟中須盤桓勿用再往返
各使中心安恐君塗上寒幅巾裁合歡恐君塗上飢烘
栗盈朱盤木落霜露急勿使衣裳單千語囑奚兒勸君
幸加餐平明奚兒至顏色驟驚顫向前往叩問淚流先
被面郎君乞致辭此生勿相見十年恩愛深謝卿重依
戀奈卿久專妒會見中情變不如痛割絕免使腸輪轉
妾身得聞之狂頓摧心肝天乎我何辜天乎真無端雖
在夢魂中不料遭棄捐恨無晨風翼迅駛追君船淚珠

千萬斛那得飛君前牽衣一慟哭身死妾亦甘縱然被
驅遣曷不先一言一去永決絕何處鳴煩冤自從入君門
歷今垂十年雖彼雞與犬亦當念周旋如何鐵石人一
絕弗復憐推胸胸血嘔委身赴清水骨肉痛如割黽勉
相救止姊恩父母深我生不如死尚冀南都還重來過
吾里性行吾熟知茲望殆已矣昔年別兩妾我淚揮不
止誰料行及身苦境苦如此嗚呼倉浪天茲恨何日已
新人入我門繡帷長日垂依稀觀容貌猶未通言詞臨

行詳睇視恰在登車時蚤知生死隔揮淚一致辭念與

小姑別淚落如連珠妾初進門來小姑九歲餘探懷索

果餌髮亂呼我梳今來已成婦骨肉情依依長別不一

語腸斷當何如我有兩丫鬟事我五六年大者髮覆額

小者亦比肩晨興聽呼喚夜深候我眠而今永隔別涕

泗紛潺湲平時解思我料爾當亦然掩淚入房來窻前

見鍼帖殘絲與剩綫寸寸皆儂血向日入君目從今長

斷絕委婉隨郎心郎心太曲折忽見大士像不覺淚滂

沱稽首乞慈悲妾身竟如何今生無罪過宿生愆怨多
安得轉君心春風被女蘿君心終不回不如赴長河稽
首乞慈悲再拜涕漣漣不望重聚首但願相見時雨落
不上天一見知何期婦人失夫心百念無可為但願新
人歡為君生男兒更念孱弱身疾苦不相離舊人識君
性新人安得知十年守窮賤心事多苦悲願君振高翮
及時凌風飛妾身長已矣相見知何期一字一嗚咽行

道皆酸悽

朱近修云源出孔雀東南飛作而不盡規撫字句才氣無前

擬古 三首

游思隨飄風遠歷杜陵道道旁合歡花悉成斷腸草紅
顏不堪駐妾愁君亦老為樂逮良辰歸來何不早人生
數離別百年非壽考擾忙風塵中榮名詎為寶

所思不可見彈古相思曲曲中竟何言理短情自促野
卉非不香采之徒躑躅今日白頭吟昨日黃金屋

誰為不死人懷此終日憂來日當大難今日且行游行
游須及時古語恒如茲口爾身不然留為他人嗤今古

更相笑游者無還期

和陶
六首

偶步短檐下淡雲如遠山
變幻斯湏間玩之欲忘言
柳青菊花黃樂飢以長年
優游苟能爾奚用百世傳

志士有奇懷何為翳我情
吾身如聚沫所寶非榮名
但問寓世間何以了一生
秋風隕枯葉慄慄心自驚
時哉不我待淹留欲何成

夕陽在高柳黃葉依風飛
我心匪傷秋不覺心獨悲
慷

慨向前行動念多所依長道眇無畛究竟將安歸中夜
發長嘯一嘯百念衰但得此中樂百年願無違

鄰家有新竹日夕百鳥喧更有古梅花植我西北偏啓
牕與相向幽幽同空山朝看樵豎來暮看樵豎還似得
古人趣有意未敢言

忽忽有所思乃在天一隅豈敢憚修阻去去登前途
驪褭猶不疾揮鞭冀長驅向謂萬里長萬里更有餘一朝
悟馳逐轉盼歸其居

問余何所好所好在六經不作亦不述好古未有成笑
彼百家言夏夏何紛更屏去勿復覽閉門書黃庭滴露
小牕前好鳥向我鳴此際意無限默默緘我情

讀史 三首

魯仲連

鄙夫寧一身身外匪所計有如魏帝秦何與魯連事先
生獨個儻慷慨決大義白日走秦兵誠哉天下士

荆軻

蕭蕭易水波日晏客未至十三死灰兒勉強共大計坐
中擊筑人何不克秦使田光死也餞於期死也贄空死
一無酬烈士喪英氣願逐酒人游哭盡不平事

諸葛亮

受託誠不易知人良獨難南陽比子房誰為鄼與韓將
相兼簿書心中多苦酸十出九空歸一身亦凋殘為君
歌梁父中夜發長歎

九日同嚴知章澹如兄弟遊茶磨山

我來松陵尋好友到門恰值九月九主人大笑攜上船
船頭載花腹載酒舟子勸上姑蘇臺衆客首肯我獨否
青山宜作生面觀耳目熟爛妍亦醜但問誰家富修竹
我船便纜堤上柳布帆直指吳山陞起覽奇蹟竟何有
洞庭縹緲波雲沉彷彿頑沙卧千畝細雨斜侵濕布袍
放船倒出蓮花淩上方樹杪插浮圖石湖湖光照戶牖
隔林前度茶磨山共約聽歌到申酉驟觀山石勢頗仄
愁無平壤安杯斝斯須簫管咽流雲畫船別駐青溪口

蘆花楓葉舞涼風，豈必美人垂素手。
同來伴侶大叫絕，私喜茲擢良不苟。
寒蒲縛蟹一十輩，烏巾注酒七八斗。
酒酣不厭觴，令酷衆人或辭我。
輒受推牕更問暄，與晴皎月若出當坐守。

茅簷雜詩

只在塵寰內，居然徑獨迂。
此君疎類我，石丈老於儒。
候雨迎鳩婦，栽花雜鼠姑。
客來深自慰，知有濁醪無。

王屋九首

屋宇孝峙初名畹字蘭九嘉善人有學可齋詩

箋

魏禹平云山人詩蒼茫磊落不作喁喁細響

詩話孝峙以詩受知魏忠節因與忠節一門羣從和酬詩類劉改之詞學辛幼安嘗過同里曹學士齋學士曰先生尚能著屐遠步邪應曰有太史公不可無牛馬走鄉里傳為新語

秋風辭

秋風秋風汝何殺我芙蓉摧我梧桐梧桐折予芙蓉死
鳳鳥安棲兮鸚鵡安宮鸚鵡逝兮文章隱鳳鳥不至兮
吾道窮夫誰使我至此極孰非爾朝夕之秋風

子夜歌 三首

千金買良玉百金求良工為儂作雙環相連無始終
妾身妾自惜君心君自知莫將日後情不如初見時
家有千黃金不如得郎心家有千倉穀不如抱郎宿

陌上桑

可憐陌上桑朝看沃若暮萎黃
餵蠶不了餵牛羊

春日過聞溪贈別許清機

我適後君來君復先我去
人生如飄蓬能得幾回聚
君

今別我歸何處直到錢塘江口住江水江雲日日流相
思時倚江頭樹

辛酉端陽日

午節今朝是開尊名酒徒趁晴刪艾葉冒雨剪菖蒲重
碧杯中滿輕黃額上塗醉憐雙鬢短還插健人符

送黃海歸新安

清秋客子歎歸歟載酒題詩一送渠細雨亂山遮汝去
淒風落葉對誰居江村處處休黃犢野店家家賣白魚

見說雅懷多不減每逢佳勝輒停車

題黃大癡橫幅山水

絕壁長松倒影低寺門殘日響迴溪老身意想如曾到
八月虞山拂水西

陸寶十五首

寶字敬身鄞縣人官內閣中書有霜鏡集

曹能始云

中翰詩逍遙容與蟬蛻塵埃之外

王伯穀云

敬身詩篇麗逸讀之惟恐其盡

屠田叔云敬

身古詩敦厚得江謝門風

近體深沉具高岑家法

詩話敬身近體好用語助辭不無狃於公安景陵之習然其才氣奔逸勝葛震甫陳仲醇且十倍近李處士杲堂輯甬上耆舊詩凡四百三十人三千餘首自詡搜隱獲奇而敬身曾與余太常君房屠儀部緯真揚處士伯翼識面卜鄰者乃獨遺之何與

五雜俎

五雜俎綺千箱往復來輦金忙不得已獻大璫

怨歌行

天胡以不五風十雨而旱潦螟賊歲靡有寧人胡以不披襟吐哺而爪牙毒螫立意相傾世胡以不解繩錯象

而戈矛荆棘日尋戰爭怨歌行此怨何時平

相公來

相公來合軍驚千夫執爻除道郊迎相公下車命長揖
口雖不言心內泣伍符尺籍新有名鶴入雞羣從自及
昔時上直何壯哉呵聲百口迅如雷行者止立坐者起
沙堤如拭大車來一朝禍至棲叢棘不賜屬鏤猶主德
卓帽騎驢出國門東海東頭聊假息秋高汛撤問歸船
手挈行囊只半肩富貴如雲真大夢胡椒鍾乳在誰邊

春雨

吾廬不厭晴吾田不厭雨
禾焦恒苦飢屋漏卒難補
人心安有極天意竟誰主
敢以一人私而忘四郊苦
雨亦恤民間涇涇注環堵
待旦問田家立苗青可數
歡然荷鍤歸兩稅登天府

大水

瀕湖盈百堵積潦失寧居
舟反高於屋人誰免作魚
撈萍迷曲巷望柳認前除
正及西成日深憂藿食餘

光宗皇帝挽歌 二首

辨色初勤政，龍樓御蹕臨。
禹謨咨益稷，殷祚促丁壬。
禁雪沾衣白，宮池染淚深。
他年青史上，從諫識天心。

喪車蘭殿出，隧道柏城通。
七月期方至，元年歷未終。
仙遊無棄屣，臣節有號弓。
嗣聖鴻猷在，河山豈盡空。

周斗文自易水歸，縱談燕太子及荆高遺事，慨然賦此。

每讀燕丹傳，長悲易水遙。
聽君談往事，風起復蕭蕭。

庚午元日

官厨柏酒泛紅霞
烽戍初停聚飲譁
遙祝萬年天子壽
小臣九十日看花

行嘉善道中夜宿朱涇

春潮覆草半江青
長水分塗客未經
少理蠶絲多織布
百家烟火傍朱涇

齋居

層層樓榭枕松關
每到花時獨不閒
酒榼茶鐺人去後

牕前一幅米家山

浴蘭初罷振纖袿
竹枕桃笙手自攜
避熱不教人點燭
滿樓涼月照登梯

送人之秦川

水鳥低飛狎榜歌
木蘭雙槳送凌波
浣紗人在中流見
錯認前山作芡蘿

湖上

承恩坊裏綠楊烟
翠幄朱樓大道邊
誰似儂家湖口住

當門人上木蘭船

廣陵懷古

茱萸灣接古邗溝
白塔河分上下流
疏鑿當時有深意
徒勞關吏日持籌

趙宦光 一首

宦光字凡夫吳人有寒山雜著

詩話凡夫以篆書名略用草書體書之號曰草篆紺園琳觀精舍名園咸乞其書題扁所撰說文長箋一時紙貴然自解人觀之未有不齒冷也古之小學書數方名字或不正童子皆知之

自周秦及漢無不識字之學生其後大小二篆生八分三真六草諸體雜出古法未盡亡者賴有許叔重說文一編自一至亥本之倉頡迨譜以四聲說文亡矣顧野王玉篇其文多於叔重孫強又增益之迨題以大廣益而玉篇亦亡矣蓋書之最古者莫如篆學野王雜以隸書已失其舊李陽冰刊定說文頗出私意詆訶許氏學者已恨之凡夫草篆具又何所本乎世人一遵晦菴朱子之說以灑掃應對進退為小學書數方名槩置不講無怪乎小學放絕篆法日微可歎也已凡夫饒於財卜築城西寒山之麓淘洗泥沙俾山骨畢露高下泉流凡游於吳者靡不造廬談讌廣為樂方特於韻語遜具鄉里

登華山

鳥道縈紆上深林幾折盤支公此銷夏五月晚猶寒

朱

鷺

四首

鷺初名家棟字白民吳人有青浮子顓籟

詩話白民負奇嘗獨游黃山遠尋嵩華所至畫
竹以自給家居撰建文書法擬思進呈請復革
除紀年不果崇禎初騎驢入都上所作甘露頌
又不果歸結茅於郡西華山蓮子峰下躬親井
臼不願見貴人年八十餘乃卒是時隱居者王
在公芥菴趙宦光凡夫時稱吳下三高而敦古
節者白民為最文

文肅特志其墓

自君之出矣

自君之出矣春去勞我思春去明年來君來定幾時

二龍見

感東宮議
立未定

一龍蒼一龍黃黃者不可以為蒼蒼者不可以為黃

過曹氏園值玉蘭盛開

花光何璀璨八牕搖一色春風過酒人忻與花相直

謁采石磯李白祠沽酒不得

先生邀月飲江邊此月年來夜夜懸我念先生對今月
恨無一斗醉祠前

徐弘澤 一首

弘澤字潤卿號春門嘉興處士有竹浪齋集

李君

實云隱君詩喜白香山陸放翁流利清越不為
鈎棘索隱 陳仲醇云隱君詩清真流便雅類

元白

題畫贈李尚寶

風卷長蘆晚雲開積水明沙邊雙白鳥逐我釣船行

周應儀 五首

應儀字元度吳江人光祿寺署丞有南北游草

詩話元度絕句小
詩極其纏綿溫麗

爛溪 二首

明月溪邊路秋風溪上船
船頭何所有滿把水中蓮
我家爛溪邊出門即溪水
秋來溪水深處處菱歌起

夏日

風荻蕭蕭日欲斜
水邨無處不荷花
遙看白鷺忽飛去
占斷柳陰一片沙

夏季風雨大作

急風斜雨百尺樓樓頭殘暑一時收而今炎景成蕭瑟
零落荷花十里秋

聞歌

桃花扇底落紛紛宛轉清歌一曲聞醉殺文園渴司馬
酒壚斜盼卓文君

張大復 一首

大復字元長吳人有梅花草堂集

少年行

連錢細馬繡纏髮翻鐙欵鞍踏曉風鞭指綠楊深樹裏
誰家小袖杏衫紅

王履和一首

履和字仲美邢臺人

驄馬行

紀乙丑林侍御事

貂璫行驄馬鳴緹綺至驄馬避驄馬欲鳴聲不長君不
見昨日新殺屯田郎

祝守範三首

守範字更生海寧人有非非集芟芟草枕中拊
岳壘室停雲諸稿

雨中過郭四葑畦別墅和王二仲皋韻

隙地新栽竹清陰覆短牆探幽停客舫引興雜飛觴暮
雨沾花徑春流到草堂物情渾可適機事久相忘

哭姑徐孺人訃自蜀中

萬里勞行役經年苦未安風塵多躑躅蘭蕙忽凋殘旅
觀荆門遠歸魂蜀道難空餘游子淚泣涕滿江干

急雨

野曠雲垂黑山高雨驟昏
鳥飛不過樹人急欲投邨
暑氣清疎簟涼颼度晚軒
客心愁襖襪賴此滌塵煩

馮嘉言 一首

嘉言字國華慈谿人天啓初諸生有十菊山人
詩集

月夜舟行

薄暝南川路相攜上釣舟
江風鳴遠樹野水映危樓
濁

酒高歌處征帆古渡頭月明動幽興擬作五湖遊

顧猷 三首

猷字若昔嘉興人有桃花里集

出塞

漢將當年此望鄉高臺雲物自茫茫羌笳漫引孤城月
金柝旋催子夜霜木落五原秋色淨草枯千磧暮烟黃
材官朔漠聞廉李烽火年來總不防

秋夜泊謝邨

水上人家半掩門
寒鴉棲盡欲黃昏
孤舟夜泊依紅樹
記得唐人詠謝邨

西湖夜別葉環中

水落西陵日已斜
濃烟疎柳半藏鴉
相逢莫謾輕相別
燈火湖頭是酒家

張志遠 三首

志遠字叔明嘉興人有竹嶼吟稿

詩話叔明隱於市廛詩為李九疑太僕所賞句
如沙崩樵徑斷水闊野橋危香吹新竹粉翠惜

小荷錢太僕稱其
清醇穩順不誣也

擬古

七雄事紛爭
嬴秦獨虎視
阿房亘長衢
轉眼成荒壘
從橫一何深
翻為逐鹿始
豈若魯仲連
千古名不死
偉哉達士心
榮華安足齒

集慶寺作

參差紅樹倚晴空
柳粟行吟度晚風
忽憶翠華臨幸處
滿山黃葉寺門東

泛月

烟雨微茫水國秋暮霞飛盡月當樓誰家短笛續長笛
吹墮微霜上客舟

殷仲春 二首

仲春字方叔秀水人有棲老堂集

詩話方叔家居杜南諸弟分處郭西之竹橋方叔葭牆茅屋不蔽風雪慕王績為人亦自號東臯子以醫為業得錢輒入市買斷爛書讀之念浮屠道士之撰述皆編入箴乃盡收醫書著錄號為醫箴岐黃家以為總龜焉方叔以天啓辛酉卒陳仲醇志其墓

湖上岡

桑柘隱斜日獨登湖上岡誰人攜小榼載酒出菰蔣
仲夏同仲醇子逸伯承秋潭汎舟城西

雨槩夷猶風幔低湖流清淺菰蘆齊相將迎入烟波去
晚泊竹橋西更西

陳元素 一首

元素字古白長洲學生

贈錦衣衛經歷白超宗

參軍也得謁金門莫憾官卑獄吏尊彭澤先生新令尹

參軍以彭澤令調

香山居士老聞孫衣歸質庫仍留客印閣閒

牀且校文冷署久淹殊不惡請看三載著書存

黃光昇 一首

光昇字義輪吳江人國子監生有破甕集

懷許受先

玄符綠字細能分家學須知有說文此去橋門摹十鼓
籀書難讀益思君

陸嘉穎 二首

嘉穎字子垂蘇州嘉定人天啓中官主簿有硯隱集

望君山

木葉下蕭蕭山容更寂寥浮天江縣小隔樹海門遙帝
子何由降騷人不可招無心貪利涉來往信漁樵

如皋道中

滿目桑麻雨露稠白花籬落遶清流家家魚畧邨邨酒
絕勝淮南十一州

吳道一首

道字實儒吳江人有山響齋詩草

一室

海內誠多故先生一室寬敢期花爛漫粗喜竹平安曝背晨曦煖推牕夜月寒遠游無勝具四壁有烟巒

周楨一首

楨字伯知吳江人有不夜齋詩稿

詩話伯知性緩嘗與弟同舟宿有偷兒扶牕入竊其篋伯知審視不語弟覺訶之偷兒踉蹌出

伯知徐曰吾欲觀其如何脫身奈何使彼狼狽而
返人以為笑其詩流便而乏警策由嬾於推敲也

寄季華弟讀書石湖草堂

青山遙入夢詩寄別愁生雨過添秋色雲開驗晚晴
藤花鋪地滿澗水入池平轉憶湖邊好中宵月倍明

陳衍四首

衍字磐生閩縣人有大江集

詩話磐生與徐興公同入曹能始閩風樓詩社
而賦才儒鈍光綖鬱而不舒其自序比於春草
蔓生秋蟲孤響
良亦自得之言

善才岫夜坐

江烟吐寒燄，倒映星河明。
潮回石勢險，孤岫西南傾。
扶筇倚危坐，仰攀崖樹橫。
夜色一向曠，波濤良未平。
奈何羈塵鞅，促促浮此生。
吾愛鄭子真，谷口田可耕。

送潘子木

送客上高樓，樓高望客舟。
但見帆檣立，不見客回頭。
始知登遠道，兩情難自保。

聽泉閣早起

山曉天氣肅衆星望已空
殘雨戀宿雲猶在寒巖東
物象紛勞役明晦互有窮
琤琤石上泉日夜流無終

十不願辭

不願化天上月那得盈盈長不缺
一不願化天上星白

日一照不分明
二不願化土中石受人踐踏無人惜
三

不願化水中灘十步上來九步難
四不願化窓前鏡十

日不磨光不瑩
五不願化沉水香煎熬燒灼心摧傷
六

不願化郎馬鞭下馬將他壁後懸
七不願化白紈扇顛

倒要他遮郎面八 不願化錦鴛鴦未必雌雄守得長九

不願化楊柳花隨風飄蕩落誰家十

吳為霖 一首

為霖字景傅無錫人有白賁集

詩話景傅詩如集場墟市骨董
斑駁陸離即而視之一錢不值

客自澄江歸有贈

浮遠堂前路微風穩放舟江昏茶磨雨烟暝弩臺秋入
饌花雞脆開封綠蟻浮西塘十八里來往候潮頭

詩話浮遠堂在君山宋紹興中建淳熙間李鶴
田珪為江陰司法題柱聯云此水自當兵十萬
昔人曾有客三千羅春伯點題名云淳熙丁未
九月既望同侯叔平等九人登君山夕陽在波
帆影散亂平淮千里去鴈無極蒼然暮色自遠
而至須臾月出東山之上江水湛然風露清美
不知在人
問世也

吳一元 一首

一元字堯開宣城諸生

冬望

野爨孤烟起灘舟一水膠深林餘敗葉高樹見危巢地

僻無行騎家貧驗素交
年年玄草在誰解子雲嘲

戈金湯 一首

金湯字帶如平湖人用泰子

郊游

雨過青山碧四圍
春風輕颺百花飛
極知良會非容易
馬上何妨酌酹歸

麻三雍 一首

三雍字仲雍宣城諸生

自平陽還襄陵道中聞蛙作

三月三日試春衣
千山萬山花亂飛
行人何處覓相識
啼鳥有時催早歸
日漸衝山鞭影急
烟初迷樹水光微
草深陣陣喧蛙鼓
鵝鴨軍聲似也非

張丑一首

丑字青父長洲人

詩話青父精於鑒古所撰清河書畫舫真蹟目錄時人比之黃伯思周公瑾詩草無傳亦有節度

墨皇齋即事

用拙經營少居閒興趣長
閱書宗海岳展畫得瀟湘
玩世歌漁父陶情付索郎
向平昏嫁畢白首杖挑榔

陳士鵠 一首

士鵠字季方秀水人有鍛齋集

秋光好

何處秋光好秋光在狹斜
碧添螺上黛黃入鬢邊
花蓄意纏頭錦輕寒繫臂紗
江州何必怨任爾聽琵琶

王彥泓十八首

彥泓字次回金壇人

缺

儒學

缺

有疑雨集

詩話風懷之作段柯古紅樓集不可得見矣存者玉溪生最擅場韓冬即次之由其緘情不露用事豔逸造語新柔令讀之者喚奈何所以擅絕也後之為豔體者言之惟恐不盡詩焉得工故必琴瑟鐘鼓之樂少而寤寐反側之情多然後可追韓軼李金沙王次回結撰深得唐人遺意起句如雨下春泥月下霜幾年辛苦是蕭郎一層芳樹一層樓只隔歡娛不隔愁月到西南倍可憐照人雙笑影娟娟中聯如燒燈院落更衣影聽曲簾櫳點屐聲當初笑語渾閒事向後思量盡可憐畫舫簾衣凭雪蕩玉箏絃索見春蔥明明可愛人如月漠漠難尋路隔烟臨水偶

來同倚檻隔花何路可登樓封來淚點紅猶濕
翦後香絲綠未齊繡佛像前同下拜泥金經尾
獨僉名含毫愛學簪花格展畫慙看出浴圖花
下小樓堆燭淚柳邊低舫載茶烟翻成繡譜傳
人畫會得琴心允客挑窓下有時思夢笑燈前
長不卸頭眠結句如水國不生紅豆子贈君何
物助相思殘陽欲度梅梢盡纔向紅窓拂鏡奩
蠟照新微香地冷珮聲纔達畫堂東闌干一曲
無多地才著思量便渺然仙家合住烟霞外金
屋藏渠也不堪今日席間誰認得舊時家令沈
休文分明蠟燭身相似纔上歡筵淚已零一生
長羨金泥蝶顫向釵邊與鏡邊皆饒風韻誦之
感心媿目
迴腸蕩氣

寄懷叡仲秣陵并促歸騎

春光漂蕩別離天心似游絲百尺牽見說人歸歸鴈後
那堪淚落落落花前南都翠黛宜為史北里紅箋定幾篇
爭似碧牕銀燭夜月痕依約話纏絲

寄懷端已白門

客懷難耐日初長馬影斜陽踏幾坊花下玉杯嘗苦筍
燈前銀葉試甜香

皆南朝風物

愁來但禱清溪廟醉後無忘

紫佩囊為覓繡鞵金縷樣倒提纖手學南唐

逋客叔菊筵

幾拍吳歛日漸曛後堂香發卷簾聞登牆雪貌東家子
映燭明姿左阿君花氣與人渾不辨竹聲如肉驟難分
分明玉樹尊前坐知是何人夢裏雲

無聊

把書移枕近牀稜歎息觀濤病未能怯暑心情猶喘月
背時風調獨懷冰無勞天女持花散有媿高人選藥稱
肯過小樓言笑否不嫌同上第三層

用陶弘
景事

城樓暝望

魚鱗波面夕陽微旋見遊船續續歸酒後笙歌催急拍
城根燈火喚開扉孤楊傍水疑人立病葉零風似蝶飛
明旦出遊晴得否月輪添暈幾重圍

無題 三首

花繞迴廊曲繞梁暗中偏認杜蘭香登樓未定銀翹顫
避燭難禁鳳屨狂怕見月痕催月姊恰宜秋色對秋孃
持裙半刻留仙住纔隔紅簾便渺茫

夜飲朝歌晝未眠輕狂全是倚孃憐妮他細語挑鍼綫

替我悲愁肆管絃夜月不移歡枕畔

借用不
夜珠事

春山長坐

酒壚前何當美玉親磨墨立到琉璃硯匣邊

怯上蘭舟細步來笑看波影按金釵陳王著眼先羅襪
溫尉關心到錦鞵把酒熨衣容旋學摘花烹茗任頻差
船孃為近窻紗泊免踏前門月露街

有贈

秋風長簟恨三年續命曾聞喚小憐已向綠珠稱弟子
儻容張碩伴神仙筵前笑顧櫻桃擲燭下偷分茉莉穿

端似悼亡唐後主見伊枝葉又情牽

代所思別後

阿姚

相逢羞澀怕猜嫌別去那知悵恨添
獨對鏡奩空怏怏乍拈鍼翦復慊慊
夢魂弱絮從風亂心緒繁花被雨霑
悔不暫留歡且住未妨長隔一重簾

續遊

嚴城間阻夢魂通小市門東更向東
翦燭寄聲書草草背燈彈淚去
怱怱花繁竹暗應迷路蝶趁鶯捎
有便風

梅蕊膽餅看漸減，每朝分插到釵叢。

賦得別夢依依到謝家

名花偏作隔牆枝，愛影憐聲入手遲。門第敢言非道蘊，

才情端喜是芳姿。桃邊未許裙題字，子敬事柳下曾將帶

乞詩。今日眼波微動處，半通商略半矜持。

左卿阿鎖

玉淨花明秀出羣，左家重見舊時芬。因披樂府吟嬌女，

便上藩車訪阿君。見陳遵傳素豔乍看疑是月，清歡何暇想

為雲那禁手炷熏籠罷笑遣蕭郎覆畫裙

追和唐女冠魚玄機十二韻

閨門文采羨玄耽更有青溪妹第三生小不闕青鎖閣
家常希換白單衫釵梁風定蟲猶顫裙衩花深蝶競銜
雅謔引經推鄭婢狂時送抱想吳男紅兒詩裏歡兼恨
素女圖前笑帶慙想見隔屏聲矻矻似聞昵枕訴誦誦
加餐意託琉璃匕寄札愁憑瑇瑁簪
古詩何計通音
信蓮花飛瑇瑁簪豈
有鵲頭能助憶願為雞舌與君含遙猜蹤影心先妒未

接言辭性已諳體自生香防姊覺者能為語任郎參髮
光可鑑千盤滑脣味如飴一啣甘記得那時偷近處唾
絨紅點碧牕南

寒詞 三首

從來國色玉光寒晝視常疑月下看况復此宵兼雪月
白衣裳凭赤闌干

夜迢迢更路迢迢澹月飄燈自過橋想得阿嬌燃燭待
也應初換第三條

牕樓映日滿樓明雪豔初臨曉鏡清良久自看還獨笑
不防身畔立卿卿

過婦家有感

歸寧去日淚痕濃鎖却妝樓第二重空剩一行遺墨在

丙寅十月十三封

王清臣一首

清臣潁州人

王貽上云天啟初潁川張遠度買田潁南地多桃花林一日攜榼獨


游見耕而歌者聽之所歌皆杜詩也遂呼與語自言王姓清臣名舊有田畏徭役盡委諸族為

人備耕遠度過其廬見舊歷紙
背以煤書所作詩其一篇云云

述懷

人生如泛梗飄飄殊無根
飲啄得幾許營營晨與昏
對此春日好荷鋤出南原
近觀草色敷靜聽鳥語繁
有身貴適意窮達安足論

明詩綜卷七十二



總校官庶吉士 臣張能照

校對官檢討 臣蕭九成

謄錄監生 臣朱文佐

謄錄舉人 臣李駟

欽定四庫全書薈要

集部
明詩綜卷七十三
四

詳校官編修臣汪鏞



欽定四庫全書薈要卷二萬五百四十六

集部

明詩綜卷七十三

翰林院檢討朱彛尊編

采一首

采字受先太倉州人崇禎戊辰進士除臨川知

縣升補禮部主事

靜志居詩話婁東二張狎主復社盟書吉士身後詔求遺書通邑大都家守其學儀部名雖少遜然里門作志留都議禮考文徵獻比於吉士功多

九日同子常東郊即事

郊行尋野勝秋遠菊花天溝曲初移逕溪深好放船冷
楓當岸落高柳隔籬穿試共登樓望寒城起暮烟

周

鑣一首

鑣字仲馭金壇人崇禎戊辰進士授南京戶部
主事轉禮部郎中削籍尋起禮部員外郎為阮
大鍼所殺有十四哀詩

詩話仲馭以鈎黨受禍與雷僉事續祚同繫請
室於時御史王愷阿阮大鍼意上疏請斬二人

既而愴吉服承旨入獄續祚謂仲馭曰王愴能
斷我首邪荅曰不斷我首吉服何為乃各作家
書訖又互書先帝遺臣四字於腹遂堆經死命
事遺命家人勿葬仿伍子胥抉目遺意置棺兩
花臺未浹月而留都不守矣方大鉞得志思盡
殺東林復社諸人及僧大悲獄起與張御史孫
振謀倡十八羅漢五十三參七十二菩薩之目
希阱諸異已者因馬輔士英不欲而止士英有
詩云蘇蕙才名千古絕陽臺歌舞世無多若使
當年不相妒也應快殺竇連波蓋以蕙擬劉副
相宗周而以陽
臺喻大鉞也

孝子魏君學泚

有鳥栖中林夜半巢忽覆兩羽既傾折遺雛寧復覈嗟

哉魏公子痛父無能救乞食向長安知交孰肯覲投書
數千言聽之耳如褻世路已如斯呼天但搔首扶櫬江
南歸墓旁日相守父存不敢先父沒不敢後含涕入下
泉一死良無疚

呂大器

三首

大器字先自遂寧人崇禎戊辰進士除行人歷
兵部左侍郎甲申以吏部左侍郎回里有集

詩話呂公驅馳南北盡瘁行間五言如野寺依
巖立官衙傍水開孤燈寒殿壁落月映山城土

瘠蟬吟屋林疎月上扉野狐衝馬立山鬼伺人
驕精衛悲銜土鷓鴣啼滿山雲烟春尚在烽火
晝相連淚盡銅駝棘歌殘玉樹花豈無丹
闕戀終抱白雲思忠孝之誠溢於言表

閒居

好山當面出旭日敞幽軒煨芋聊充飯烹泉不問源譚
玄藏史李學稼小人樊數得林間趣花開鳥亦言

晚次江門

世事何年定江皋且振衣樹紅橙子熟濤白鯉魚肥獨
鳥衝烟去殘霞壓岸飛邛膠無處得空對月光輝

落索河有感

百折波濤險一泓山澗清天高雲黯淡巖老石崢嶸古
洞都成穴諸峰盡築城版圖猶蜀界風土半秦聲杜宇
啼方歇銅駝歎未傾旌幢連赤縣烽火到神京嫠婦徒
存恤羣臣孰請纓傷子才略淺深媿李西平

姚思孝一首

思孝字永言江都人崇禎戊辰進士改庶吉士
授戶科給事中歷兵工二科謫江西布政司照

磨稍遷南國子助教升南太僕寺丞轉光祿少
卿再轉大理少卿

康山

康山一簣草萋萋無復豪華似許西猶有揚州舊時月
翠禽飛上玉梅啼

葛徵奇 三首

徵奇字無奇海寧人崇禎戊辰進士除中書舍
人選授湖廣道御史升太僕寺卿轉光祿卿有

蕪園集

詩話光祿樂志林園又得聞人
唱和格雖未高亦自超超拔俗

晚眺隅園

三月十日雨薄霧花濛濛
小大澗壑鳴百道源相通
潭魚躍新水園竹抽春叢
禽鳥忽變聲迺知天氣融
登高一以眺澄覽衆慮空
玄理羣所貴耳目悅且克
於焉坐垂釣自擬滄浪翁

武林留別吳梅里

昨喜逢初地蘭缸夜雨紅故人相爾汝今日又西東
楓落前山樹嶺開別墅風小牕涼月靜客夢與誰同

題畫芙蓉

秋來烟水多蘆葦渺難即愛此江上花日坐雙鷓鴣

冒起宗一首

起宗字宗起如皋人崇禎戊辰進士除行人升
南京吏部主事歷郎中出為山東按察僉事遷
湖廣布政參議

同年朱泰符過訪衡陽余已遄發襄州矣吾兩人
同一不偶乎

秋老蒸江獨鴈飛相思命駕重依依久拚歲月頭俱白
堪笑風塵事益非地主忽從交臂失天涯安得並舟歸
兼聞親舊多顛顛悵望鄉關淚幾揮

葉重華一首

重華字德玄崑山人崇禎戊辰進士除工部主
事尋改禮部歷員外郎中出為浙江布政司參

議轉河南按察副使遷山東廣東參政

從軍行

吳鈞雪色滿天山血戰黃沙萬里還但願畫圖麟閣上
不須生入玉門關

吳載鰲

一首

載鰲字大車晉江籍宜黃人崇禎戊辰進士除
澄海知縣謫浙江按察司照磨升金華推官入
為戶部主事歷員外郎中轉廣東按察副使改

授翰林院侍講

姜給諫以五羊石見貽賦謝

文饒平泉莊有石自言好何如初平羊眠雲啣瑤草

李奇玉 三首

奇玉字元美嘉善人天啓壬戌會試中式崇禎

戊辰進士選武學教授遷國子博士歷南京工

部主事改兵部員外由郎中出知寧國府有雪

園遺草

潭柘寺讀書

讀書潭柘巔身在白雲裏開軒豁遠眸風瀑洗心耳古
木挂青蛇云是二龍子下方鐘磬餘僧寮各棲止山童
剔殘燈埽葉烹泉水闐然羣籟寂明月射牕几

過京口

蕭條書劍下關河芳草萋萋客裏過原上鶯花三月暮
天涯愁病一身多海門帆影移青嶂山寺鐘聲到綠蘿
入望自知鄉國近那堪斜日聽漁歌

山居

方花礎潤氣氤氳靜對薰爐柏子焚夜半雨聲新水漲
枕邊流出一溪雲

顏俊彥

俊彥字開美桐鄉人崇禎戊辰進士授廣州推
官被劾再補松江推官有缺集

邨居雜興

病卧經旬滿面埃梅花落盡杏花開畫梁無數空巢在

社雨蕭蕭燕不來

龔士驥 一首

士驥字季良義烏人崇禎戊辰進士溧水知縣

惜取

惜取檐前葉休教落地輕夜牕留聽雨葉葉是秋聲

萬壽祺 二首

壽祺字年少徐州人崇禎庚午舉人有隰西草

堂集

詩話年少多才多藝詩亦
清逸無弩目掀髯之狀

憶錢大

忽憶南徐道春風樓上年
晚鶯移浦樹苦菜秀沙田
驛路歸人少蛟門落照懸
如何問津者五載滯江船

入沛宮

泗亭春盡樹婆娑漢帝宸遊不再過
魂魄有時還至沛樓臺落日半臨河
風吹大澤龍蛇近天入平沙鴈鷺多
我亦遠隨黃綺去東山重唱采芝歌

魏冲三首

冲字道用常熟人宗禎庚午舉人有小碎集

采蓮曲

北渚采菱歸前溪采蓮去無端墮玉釵記在迴舟處

元日

年年悲作客今日賦閒居春草生新夢山花滿舊廬畏
人書謝病示儉食從蔬問字吾何有無勞長者車

春晚

梅葉初齊梅子勻
新榆穉柳暗通津
春深莫惜餘花盡
却喜黃鸝不露身

陸坦二首

坦字履長蘇州嘉定人
崇禎庚午舉人銓授南
豐知縣不赴隱居鄧尉山
有庚除詩稿

和姚修民簡寄

世逐浮雲換身同
落葉輕難忘百年恨
誰殉一朝名去
國懷公子憂時過
賈生江皋無限淚
日暮不勝情

春夜雪

春雨聲聲入夢闌
暗牕風動曉燈殘
濕雲壓竹鳥驚墮
起看空階一片寒

徐柏齡二首

柏齡字節之嘉興人
崇禎庚午舉人
署永嘉儒

學教諭

詩話孝廉湖海播遷
詩不猶人自出杼軸

春日

風聲起松末窈若萬壑深誰謂市井喧遂無天地心可
惜天桃花不言萎空林明年縱復開顏色不如今

壽寧逢艾千子

白日黯無色城門掩半開故人何地別間道此時來鄉
夢遠難寄官程近莫催江關庾開府詞賦不勝哀

江心寺文信國祠

孤嶼浮江面寒潮撼石根遙遙箕尾外何處可招魂

張溥一首

溥字天如太倉州人崇禎辛未進士改庶吉士

有七錄齋集

陳卧子云天如忠愛誦孟門行可見一斑卒後而動聖主之思有以

也

詩話天如狎主復社以附東林聲氣求龍集
鳳會一言以為月旦四海重其人倫書畧刻而
百函賓晝日以三接由是青衿胄子白蠟明經
登李元禮之門不啻虬戶為柳伯騫所識勝於
筍金列郡人文一時風尚口談朝事案置漢書
頭包露額之中足著踏跟之履和歌下里擁鼻
東川俄而哲人其萎踐康成之妖夢天子有詔
求司馬之遺書黨論日興清流釀禍周之變彈
之於始阮大鍼厄之於
終而邦國因之殄瘁矣

孟門行

雙絲繫玉環宛轉生光澤本以結同心何知反棄擲君
家美酒琥珀光紅顏少年坐滿堂酒酣意氣不可當君
家玉堂盛孟門孟門深谷無朝昏中有美人嘯且歌仁
義結客客自多相與醉君金叵羅黃雀銜環報舊主畏
君彈射遠飛去夜深孤棲城北樹

李舒章云得
崔顥之神

吳太沖一首

太沖字默寘錢塘人崇禎辛未進士改庶吉士

授簡討升南京國子司業轉右中允有息心窩

詩集

陸水修云先生林下之詩勝於館閣

朱美之攜酒過

綠陰叢裏放玫瑰石几相延坐碧苔
百里雙鉞春酒釀
一年幾個故人來厨丁細切溪頭筍
穉子貪爭屋角梅
信道朱游能折鹿譚經且喜得相陪

姜 埰 八首

埰字如農萊陽人崇禎辛未進士除密雲知縣

改儀真入為禮部主事選授禮科給事中以言

事廷杖削籍戍宣城有敬亭集

黃九烟云先生詩發乎性情本

乎忠孝名實交孚纏繇盡致錢幼光云先生詩大抵取法於柴桑浣花其志同其調不覺其

也同

詩話廷杖與東西殿錦衣衛鎮撫司獄用刑之酷前代未有自王振亂政鞭撻朝士大臣有枷項者迨成化中汪直用事廷杖臺省臣王濬李俊等五十六人正德間以諫南巡杖舒芬黃鞏等百三十人死者十一人嘉靖初以爭大禮哭左順門杖豐熙等百三十四人死者十七人此其最甚者矣萬曆六年論首輔張居正奪情杖趙用賢沈思孝鄒元標等五人後定陵頗厭建

言諸臣疏多留中廷杖寢不用至天啓四年太監王體乾奉勅大審復開其端重笞戚臣李承恩以悅魏忠賢於是主事萬燝御史吳裕中相繼斃杖下而許顯純田爾畊輩煩刑以逞備極慘毒揚左諸君子之禍有不忍言者矣思陵即昨雪消見覲用獄稍平不意嘉魚熊公暨萊陽姜公論列柄臣時日輻輳逆鱗既觸天怒莫回拷掠之慘洵九死而一生者蓋至柄臣自裁而兩公之荷戈終未見釋姜公臨沒語其子安節實節曰敬亭吾戍所也戍者吾君所命吾未聞後命而君亡吾猶罪人也死必埋吾戍所乃葬宣城公晚歲始為詩風格一本杜陵其自序云託哀鳴於異鳥感音節於候蟲可謂善於喻物者也

秋懷

仰視雲中鴈飛鳴何翩翩朔風自北來玉塞起塵烟昔
聞漢武帝防秋守九邊拓疆猶未已奄忽下重泉哀哉
重泉下元狐陟其巔大江萬里長下有蛟龍淵回頭夜
怒號聲怪震百川我欲往從之褰衣不得前願言長相
憶中心淚漣漣

和陶輓歌辭哭左侍郎仲及

大風自北來寒木正蕭蕭多少舊墳墓不知在何郊獨
君三尺土高山共嶢嶢我來拜君墓手折白楊條所取

非揚條答贈在今朝君死則已矣我生可奈何我豈貪
生流母老強還家既為君作傳又為君輓歌生則託金
蘭死當告山阿

發使東歸

城南薄田十八墪高者桑柘低稌秔白日黃狐牆頭立

既不殺之當與揖

曾青藜
云稟兀

簡余寒鐵

自我不見余秀才夏云徂矣秋風來我今一到秀才宅

堂前堂後生蒿萊丈夫骯髒只如此誓欲破家去鄉里
今日路旁一匹夫當時萬言干天子低頭俛首心不辭
養雞牧豕身應爾君今讀書停雲館仰天狂歌何衍衍
有時野老扶杖過烹葵摘果酒先煖白公隄上波欲沒
期君同看溪雲滿

赴戍宣州衛

垂死承恩譴天威咫尺間荷戈荒徼去收骨瘴江還袞
職猶思補龍顏竟絕攀橋陵千滴淚獨在敬亭山

鑿江雜詠

老去人猶在春來客未旋側身天地外卜宅水雲邊月
照歸樓鳥江喧出口船苦遭生意短白髮不相憐

九日登越州稷山和弟垓

萬木凋霜嶺千巖帶水邨雲屯山郭靜潮過海門昏阜
帽風堪落黃花酒正溫愁聞江徼外鳴鏑滿中原

送林衡者還嘉善

相知不在久岐路莫頻驚客舍由拳地鄉心夾漈城霜

前孤鴈白雨後一湖明為報余生札平安問舊京

周燦 三首

燦字光甫吳江人崇禎辛未進士知宣化會稽

二縣選授浙江道御史有澤畔吟

陳皇士云侍御詩彬彬有

序大雅之音

丹青引贈顧子

山莫畫泰山松松樹已受秦皇封水莫畫黃河潦河流
已非夏后道但作清溪竹樹灣添我垂釣於其間吁嗟

乎男兒少壯隨朝彥豈料中年桑海變枉想丹青麟閣
中他人為我開生面顧生顧生爾莫嗔傳神似爾畫逼
真如何貌此尋常人

韓蘄王碑

西湖湖曲騎驢翁中興十將稱最雄道逢姦相但長揖
斯人豈比張魏公鄂王英武庶其匹時危協力扶王室
龍王廟前金鼓震遺恨書生黨已密公之骨埋荒墳公
之烈存碑文華堂鐵券雖已失千載猶傳趙雄筆

徐電發云

辭不多而激昂流轉斯人豈比
張魏公一語足慰蘄王於泉下

鄰翁邀食五月桃戲作

桃實纍纍也足豪主人笑釘玉盤高仙家一熟三千歲
五月先嘗遜我曹

許
易一首

易字玉斧侯官人崇禎辛未進士除戶部主事
歷員外郎出為浙江按察僉事以叅議提督學
政有春及堂詩

建州逢陳德輝

已分別離久何期此地同
西城山路近南浦野橋通信
宿情何極他鄉歲欲終
維舟無限意相對有飛鴻

送友之瓊州

匹馬珠厓路須防瘴嶺雲
纒童青箬笠黎女綠蕉裙
潮有東西候時占朔望
分臨岐還把臂不敢說離羣

春日送客

春光初荏苒客路惜分攜
露濕鶯花重風吹燕麥齊
孤

燈茅店裏殘月柳橋西別思千峰外猿聲不住啼

黃坤五云

玉斧五律聲調委婉趣味澄幽
誦之如流水平橋佳趣自在

張鳳翥 一首

鳳翥字儀明一字威亦宿松人崇禎辛未進士

除嘉興知縣補仁壽升刑部主事歷湖廣按察

副使

詩話張公牽絲作宰以慈得民晚節禦侮危疆
吮血裹瘡接戰而死忠勇不可及也詩又安雅

絕無叫
頭之氣

武陵道中

孤城臨古渡斜日一舟橫北渚離人目西風遠客程藤
疎知樹冷權響信江平不用分漁火前洲月已生

于
穎一首

穎字長公金壇人崇禎辛未進士除工部主事
歷員外郎出知西安府削籍尋復工部郎中知
順德紹興二府升浙江按察副使分巡寧紹道

新歲次茂貽韻

不覺流光度霜華入鬢邊難忘惟舊雨相對又新年學
佛寧遺世為農敢問天椒花一相勸身世各悽然

管正傳一首

正傳字元心長洲人崇禎辛未進士除永新知
縣調贛縣有積書巖詩草

詩話元心詩思入微原本易林太玄當其意匠
經營幾欲效修羅遁跡藕絲中然猶取材於古
故方之徐元歎張草
臣諸子較勝一籌

西泠橋

斷嶺寒烟落晚鴉
閉聽漁鼓傍橋
搨誰知湖上
鬱鬱月
又照錢塘蘇小家

薛 家 一首

竈字諧孟武
進入崇禎
辛未進士
選武學教授
升國子助教
轉南刑部主事
歷郎中
出知開封
府
晚為僧號米堆和尚

金陵

野曠風鳶捷
江空石燕輕
年年春草綠
不忍上臺城

成仲龍 一首

仲龍字為霖長垣人崇禎辛未進士除夏邑知縣調永城選授兵科給事中出為浙江按察僉事轉參議遷陝西參政歷布政使有東壁樓集

除日立春

除日今朝是蹉跎又一年歲從燈下改春訝歷頭先柏
酒愁無分柴門靜可憐半生成底事兩鬢已皤然

劉應迪 一首

應迪字簡在金谿人崇禎辛未進士閩中知縣

曉起

曉色漸熹微
柝聲聽漸稀
月潛銷客袂
燈已失林扉
竹外風翻冷
花間露欲晞
巢鳥棲未穩
先上女牆飛

王 斥 二首

斥字王屋蘭陽人崇禎辛未進士滋陽知縣有
王王屋集

詩話王屋嗜奇鞭驅險句觀其起釁宗藩自理
一疏辭艱晦而不舒在納言難以封進乃以未

將金幣自尤尤
人得毋過與

謫歸曉經中山

長安日以遠
古道風淒淒
草濕蛩聲緩
林深鵲起低
殘兵親廢壘
孤客度危蹊
去國莫悲戀
一枝不借栖

病卧聞砧

白露蒹葭老
西風梨棗肥
可憐人病卧
翻羨鳥高飛
藥竈縈秋草
蓼牀帶落暉
那堪砧杵急
盡力擣寒衣

張明弼 一首

明弼字公亮金壇人崇禎癸酉舉人揭陽知縣

有螢芝集

俞右吉云公亮經生垂白始領賢書遇一人知己津津不置

金陵送胡常之歸九華

目極秋江隱碧山九峰想像有無間孤舟此去回鳧鴈
知宿蒹葭第幾灣

陳宗之十一首

宗之字玉立長洲人崇禎癸酉舉人

詩話啓禎間竟陵流派盛行於吳中雖有林若撫力持唐調然而捷敏未免率易玉立矜鍊獨

操正始之音八門七
堰六十坊可以獨步

擬陶二首

藹藹堂前木時至忽成林
首夏方澄和凱風散幽襟
我愛白日靜觸物每微唸
息影盤石邊時鳥懷好音
鼠壤有餘蔬東膠聊自斟
雖無高世軌撫已安夙心
先師有遺言謀道匪自今
已矣何所羨林栖豈在深

人生無定轍榮辱隨所遭
豈無賢達心屈跡沉蓬蒿
老萊安葭牆仲由甘緼袍
較量軌迹間與世竟孰高
不恥

一身之所傷生民勞風塵暗畿甸溝水事桔槔清夜起
長歎念之首重搔安得田子春節義稱士豪雅志雖未
申良足媿滔滔

世化

往聞漫翁言日月化豺虎斯語恐未然含疑不輕吐及
乎遭世喪所遇賊聽覩中原延寇氛蕩析無寧宇菰蘆
一方地荒疫亦愁苦天高吏肆酷法密民罹罟人鬼須
臾間牽率歸黃土安得山阿栖飲泉采芳杜緬懷盛年

時邈若羲皇古

漢道

漢道昔云季四海沸羣雄賢士失網維奔竄投西東管
寧栖遼海田疇隱無終鄭玄與王粲各自獲所從如何
盛明世栖栖泥淖中雨雪積荒塗渚田路不通寧無北
門歎要自秉固窮疾耕寡樂郊仕官乏奇功乾坤雖浩
廣無隙置薄躬愴惻衡門下憂來溯悲風

悔

磽田不可耕濁水不可釣常思汗漫游高卧青山嶠此
意更莫酬蹉跎失年少讀書近浮名趨俗失要妙幽幽
寒溪側寂寂孤燈照故林擁敝裘密雪陷爐鉞兒飢每
索錢愁來獨悲嘯

登翁漢津水臺

朝卧采山堂暮登漁山閣漁采俱在山始信湖中樂閣
盡有高臺峒堯出寥廓茫茫笠澤帆隱隱浮屠嶠峰秀
無匿覽波光恣開拓始冬似佳秋風日猶晶灼古樹儼

當階黃葉深未落葛翁不可招丹竈安所託空餘泛宅
游未踐褰裳諾宿契必有期無怨猿與鶴

游金菴

放櫂非有期泛觀湖中山偶然入幽境遂叩高峰關老
衲出肅客蒼顏映丹顏同坐絕壁下始知身世閒飯我
青精香供我綠菊斑葑山觜已沒金菴徑可攀歸塗歷
清溪荒寂幾灣環萬堆黃葉中清磬激潺湲月出每孤
往又逐漁舟還

病橘

病橘含辛實淒然
墮曉風本無雕飾
分敢恨託根窮
斷續陰依井低昂
鳥啄蟲可憐
冰雪後剩有一枝紅

周青士云

蒼老
工緻

感時

花石網看艮岳移
麝香裙冷護宮衣
紅燈小隊湖游夜
知否襄陽六載圍

寄衣曲

前庭踏鞠後庭歌主將功高意氣多不信沙場征戰苦
年年擣練寄金河

秋山即事

宋朝自名种明逸漢室何知鄭子真今日徵君何草草
馬蹄手板拜紅塵

李天植 五首

天植字因仲平湖人崇禎癸酉舉人晚更名確
字潛夫隱居龍湫山有蜃園山游諸集

陸次友
云因仲

高蹈詩多激逸合
乎清江碧嶂之音

詠史

秦皇制六合焚書築長城萬古以為罪孰為原其情典
籍付煨燼大易道獨行豈識理數原尚留天地精紫塞
亘萬里外內界則明春秋重此義茲尚存典刑後世經
術儒勦說日以橫胡然南面尊不恥城下盟祖龍而有
知其氣殊未平

雪夜泊舟許墅

朔雪沉宵柝江關卧未安
牕虛得疎響舟重壓新寒
梅落倡樓笛蘆垂釣子灘
鄰航催曉發得共月華看

游青蓮寺

香刹從來古春風客到稀
溪光平入座竹色冷侵衣
地僻鳥無語林深花自飛
相過逢勝侶並坐話清機

獻生賦謝鄰叟

瓜蔬吾所愛分惠媿芳鄰
不忍私佳種還期及令辰
青囊珍重意白髮老成人
生計憐余薄時來話苦辛

山中訪宋爾垣

風吹帆影過西城一片浮雲嶺上晴
滿地落紅都不埽
萬松臺畔讀書聲

謝 遴 二首

遴字彙先宜興人崇禎癸酉舉人有是亦樓存稿

詩話孝廉晦迹衡門種菜一畦不入城府陳檢討其年寄懷詩云半畝牛宮繞菜田鉏畦汲水獨悠然芒屨一輛千金值不踏城

中二十年其詩頗效林逋魏野

銅官山書齋

坐卧深林裏，窓開別一天。
山腰埋宿雨，石面瀉流泉。
路盡雲猶觸，邨分樹尚連。
烟霞吾所戀，只此可忘年。

河間道中

猶復驅車去，行蹤何處留。
閭閻移馬廐，市井割鴻溝。
草濕王孫淚，塵淹季子裘。
那堪鬼車鳥，風雨夜啾啾。

陶汝鼐 四首

汝鼐字仲調，一字燮友，長沙人。崇禎癸酉舉人。

有榮木堂集

詩話先生壯歲好游自吳入越與先人訂僑札
之分嘗留檣李度歲晚際此離出監軍事捍禦
鄉邦著力豎章堵兩公盡瘁畧同讀哀湖南賦
悽戾過於蘭成詩雖未脫景陵之派然覺爽氣
殊倫

京山道中探觀音巖尋磴掬水歷巖上下古木峭
壁高瀑競響舊有李本寧先生園今廢愴然有作
層巖近大道其麓如深邨僧包立樹下過橋知寺門庭
前雙老榦一為娑羅根虛閣覆巖壁滿屋蛟螭痕飛流

響石罅奮躍探其源涓涓出澗尾色白河崑崙掬飲泉
上下微覺分清溫巖阿受夕陽偶坐如朝暾戀賞勿忍
去出溪松路昏惜哉平泉後亦不理茲園

金正希招集練江醉宿清淨寺

冬、霜萬壑陰江永日將夕畫舫泛容與川暝光愈白急
風吹燭花谷響合歌拍小榼僧厨來蔬笋界方格語笑
酒易傾如以桐叩石柱史如枯禪城市無一宅酒深思
啜茗同作虎溪客貝葉啓禪書梅花落瑤席坐久聞妙

香一榻隨所擇睡鄉鐘鼓鳴林鳥翻旅翮吾亦步下山
佛燈猶照壁

嚴州道中

曲江流不盡寒氣凜初嚴野泊紛漁艇遙帆類酒帘枯
河冬雨活濕壁凍雲黏不分多歸思蕭蕭與夢添

哭亡弟鼎幼調

孝友人皆見居家母最憐不留娛白髮非意及黃泉鳩
杖難消噎驪珠易返淵老兄千斛淚不敢墮親前

陸清源 一首

清源字嗣白平湖人崇禎甲戌進士除增城知
縣擢雲南道御史巡按福建後為馬士英部將
趙體元所殺

答黃石齋先生

問俗停車到海濱羽書詎敢計安危孤城吹笛思當日
中夜聞雞豈異時北望烽烟勞夢遠東瞻林墅出山遲
蒼生極目堪流涕何日綸巾一視師

傅巖二首

巖字野倩義烏人崇禎甲戌進士除歙縣知縣
擢江西道御史有花巢詩稿

庚辰元旦

曉起看雙鬢居然比昨非趨朝人語早掩幔客來稀酌
酒分居後傳柑秩尚微遙思故鄉會是日定春衣

姑蘇早發

吳閶西去片帆輕野樹微茫水國平一夜櫓聲搖月影

不知枕上過菰城

文德翼 一首

德翼字用昭德化人崇禎甲戌進士除嘉興府
推官擢吏部主事有燈巖詩集

池口阻風

伸腳蓬牕西日移打頭蘆渚北風吹沿城路僻多蚊蚋
到夏江深少蛤蜊山色杳冥歸謝朓笛聲惆悵憶桓伊
頽年自笑滄洲客破浪那能萬里期

吳本泰 二十一首

本泰字美子一字藥師仁和人崇禎甲戌進士
除行人選授吏部主事改南京禮部歷郎中有
海粟堂集秋舫箋北游西征東瞻南還嶽游諸

草

周青士云吏部五古出入選
唐竹枝宛轉猶存老鐵遺響

詩話吏部當正聲微茫之日獨操大雅之音而
揚抗風雅者或不及焉益信曲高者和彌寡也

帝京篇

崇禎元
年作

夢想黃金臺來歌白石粲明明聖人出旭日天方旦廣

殿飭梓材神霄聳輪奐薇垣格澤消芝蓋卿雲縵三吳
罷機杼九廟秉珪瓚下國頌時雍至尊理宵旰宵旰懷
殷憂邊籌寢弛旣軍需而飛檄催水衡仰屋歎大姦已距
脫羣疑未水泮漸鴻雖可儀羔羊不聞讚名盛實則衰
事倍功乃半因之勅樂康匪伊游泮奐君旣勤晝接臣
當思日贊朝中去朋黨政府參謀斷網必挈其綱繩先
理其亂求治毋太速防微勿滋蔓所期日月光幽遐理

必貫

朱近修云通
篇沉着不浮

靜海道中大風

海人行海國謂應狎波濤波濤湊不見曠野天風號寒
日澹無光動地卷白茅疑有鐵騎驅虺突鳴弓刀離羣
慘孤鴈失木傷哀猿巾車紛欲裂簸蕩如輕舫四射中
肌膚一寒欺復陶豈關造物意人事或偶遭方驚萬里
轉寧憚險與勞

任丘張氏園藍田先生授經處

不識魚君陂幸識魚君令城隅敞臺榭水木相翳映謂

予此棲遲差可閒眺聽是時秋氣深白露漸蘭徑瘦石
裏苔斑寒花棲蜨暝女牆邏柝喧梵閣宵鐘應慮澹羣
物輕時危百憂并皎皎明月枝驚鳥棲不定茗牕靜披
覽冥緬獨無竟昔賢曾授經履屐痕猶賸

臨淮道中雪

昨日春氣喧僕夫俱喘汗今晨北風厲雪花卷行幔天
時自迴薄人意驚錯換況乃事徂征惻惻羈魂斷長淮
望不極鍾離道方半踉蹌赴郵程渺瀰惑阡畔暝鴉寒

不呼翻飛忽零亂
車上水滿髭車下泥沒
胛紅燭映深
簾寧知旅人歎

陋巷井

改邑不改井泠泠無古今
原泉何方來或是泰山岑
仰之既彌高俯之亦彌深
屢空其庶而澹然助齋心
仲尼飯蔬飲應與共酌
斟禹稷憂飢溺易地同
所任至味無異旨樂哉
此中尋

秋雨歎

晨雞喔喔天未明
潰垣忽作崩雷聲
裳衣顛倒書帙亂
蒼茫四顧心獨驚
陰厓潭水深千尺
飢蛟掉尾盤渦黑
我欲拔劍往斬之
出戶踟躕三歎息

賦得草徑入荒園

匝地蘼蕪綠戎戎
接短垣路迂隨鹿引
邨靜覺禽喧泣
露沾芒屨頽陽卧
瓦罇園下渾解事
野藪具盤飧

秋住湖口

雨夜官城暗霜期
候鴈呼瘦筇黃葉寺
高枕白雲湖歲

月傷羈客烟波狎釣徒
醉吟楓落句秋思滿東吳

冬日邨居

短景催年盡荒齋擁膝安
甘蕉經雨敗叢菊抱霜乾
閉戶腰肢健干人齒頰難
得閒能幾日杯勺此盤桓

候舟

浦口千檣集占風信宿遲
長雲鴻沒影古壘樹無枝
人語殊方雜客心孤月知
湯湯濁河水利涉問舟師

阿城逢秋

野棗青未熟渚蓮紅欲銷涼風髡鵲頂新水長魚苗江
上客星小亂餘兵氣驕秋來無別夢長畔鹿門樵

由歙邑入海陽

淺瀨無舟渡迴溪有路通獨行過市上元只在山中齋
麥搖晴綠林蕉逗晚紅清鐘隔巖寺留憩聽松風

庚申中秋

叢桂生陰雨氣涼少焉月出四山蒼于飛鵲繞樹三匝
所謂人居水一方素蕩紅菱秋饌美畫船烏榜怨歌長

徘徊顧兔傷流景爭乞雲英玉杵霜

任城將南還半舫先生餉酒走筆言謝

李白樓前黃葉洲欲發不發仍淹留青瑣近對許主簿
白衣恰送王江州五侯掉頭那肯顧一杯入手百不憂
讀公新詩飲公酒醉眠松石風颼颼

寒食感事

南朔城荒春到稀西山雪盡尚沾衣別來桃李三年夢
老去兵戈萬事非行腳出家猶有累低眉獻賦不如歸

試看縣上神林近野爨無烟空淚揮

西湖竹枝詞 五首

西湖湖水碧琉璃西湖楊柳綠茸絲
愛殺桃花紅片片却似西施好面皮

繆天自云此用唐人迴波樂辭不為鹿也

與郎暗約段橋西早起妝樓欲下梯
宿雨半收晴未穩惱人最是鶉鳩啼

薺麥青青三月三看看草色暗湖南
忙催姊妹燒香去戴勝來時又養蠶

放生池岸柳叢叢香閣鈴幡四面風輕薄少年乘醉過
手提射鴨竹枝弓

踏青湖上懶歸家更愛山行輦路賒妾上笨車郎跨蹇
西溪十八里梅花

春曉

南來消息斷歸鴻江國迷春曉夢中斜帶參星杏花白
依稀牆半宋家東

凌世韶 一首

世韶字官球歙人崇禎甲戌進士除寧化知縣

謫江西按察司簡較改興化府經歷升處州一作

嚴府推官入為戶部主事有汭沙草陳皇士云汭沙廉吏

晚棄家隱黃山詩有清韻

惠州西湖

湖面寒光一鏡平
露荷烟草入秋清
白鷗浴罷各飛去
遙見潮痕郭外生

周之璣四首

之璵字玉鳧長洲人崇禎甲戌進士除刑部主
事歷禮部員外郎

讀史感懷

石羊埋棘漆燈冥

一作
焚

短犢橫牽上廢亭金盃更從何

處覓春深杜宇哭冬青

詩話玉鳧讀史感懷六十首援
古驗今不失國風小雅之旨

漢皇恭儉百無營衡石投籤久勵精端為黼宸求治速
翻教安石誤蒼生

寶帶橫鞞建碧油居然鞞鞅閣東牛未聞奏捷傳淝水
又見稱兵犯石頭

參軍空自賦燕城一歲人間草一青隴首寒雲常漠漠
風蒲依舊滿臨平

劉侗 二首

侗字同人麻城人崇禎甲戌進士除吳縣知縣

未任卒

曹潔躬云同人以文體矜奇為學使置
下等憤懣入太學連舉鄉會試留都亭

日與子司直共輯帝京景物略文
筆詭異蓋亦服習竟陵流派者

賽社詞

春社典春衣秋社饜梁肉婦子且莫嘻場熟廩不熟遼
陽方告警農助官家穀遼租十增三官租三增六里胥
登門催斛半量一斛益以雀鼠耗完數恒不足賽社報
年豐社神聽我祝但願邊患平強於倉儲蓄神保太息
言邊平爾何福糗隨兵餉加不隨兵餉復播州幾月兵
至今農噉粥

久遊復至鄂得家信將別黃宗之

出門未暑秋仍滯十度曾登送別舟
以客畏聞家有信逢人俱道邑無收
衣糶不恥因良友僮僕多言怨漫遊
夜夜酒同鄉夢醒舍邊雞與渚邊鷗

陳組綬一首

組綬字伯玉武進人崇禎甲戌進士除兵部主
事有伊菴稿

舟泊清河有攜絃索過飲者

客思紛河北商絃復漢南星光零夕霧邨柝靜虛潭去

國黃花九逢人白社三曾為記歌者不醉亦何堪

朱芾煌 五首

芾煌字玉璫無為州人崇禎甲戌進士除餘姚知縣調樂安入為戶部主事謫補順天儒學教授稍遷國子監博士升車駕主事歷武選郎中

有文嗜堂詩集

宋牧仲云武選樂府學長吉間出文昌玉溪溪間古詩近體出入

三唐要多自得能不牽於習尚 尤展成云武選詩思深而志遠 徐電發云武選紀事之作 和而不流哀而不 激七絕尤稱擅場

獨步文德橋

畫樓高閣不同登
雀舫鵝笙亦自憎
每日杖藜橋上立
青青雨過看鍾陵

北行江上阻風

荻港黃雲壓水流
風翻白浪打船頭
長年莫道秋江冷
揚柳堤南是酒樓

示從行汪伶

歌行作使得何戡
尚與殷勤佐酒酣
我有傷心千種恨

鷓鴣切莫唱江南

與客飲感舊

檀板牙牌事事新
小車花下自相親
勸君莫惜花前醉
舊醉花前今幾人

雜吟

賽社人稀古廟東
午烟晴裊酒旗風
游人不盡春游興
醉帽欹斜落日中

王 潢 一首

黃字元倬上元人崇禎丙子舉人有南陔集九

烟云元倬詩沉雄渾鬱頓挫瀏離大都發源於

騷雅徵材於漢魏歸根於杜陵薛諧孟云元

倬忠孝之性溢於毫楮纏絲悽惻而未已顧

寧人云先生詩深以婉和而摯不失三百篇溫

柔敦厚之旨方爾止云元倬格律森

嚴用意深至雖憤時嫉俗而渾然不覺

宿松風閣分韻得吟字

靄靄歲云暮風雨恒見侵小霽憩山閣蕭颯吹寒霖澗
壑亂餘響鐘鼓沈清音蒼蚪卧蜿蜒拏攬力不任羽觴
亦以歇剪燭聞鳴琴嘿坐得冥會擁褐成孤吟須臾微

霰集晨起雪在林樵徑斷人語四野號飢禽皎皎二三
子貞白同松心炎暉諒可埃見覲消重陰

萬泰四首

泰字履安鄞縣人宗禎丙子舉人有寒松齋稿
詩話孝廉鈞黨顧厨士林圭臬兵後以經史分
授諸子各名一家其最著者斯大充宗斯同季
野也詩多清商變徵之音羊城旅懷等作見者
十手傳鈔其云廣柳車中容季布湘江澤畔問
巫陽舟經彭澤竟客死
舟中識者以為識云

客中初度

朝來虎阜攬春暉
矯首林泉興不違
故國青山殊自好
王孫芳草幾時歸
遙將兒女庭前淚
灑入江湖客子衣
舉目傷心歌舞地
多情揚柳故依依

釣臺有感謝皋羽遺事

當年君哭文丞相
今日吾來當哭誰
暮雨寒潮楓落後
朔風極浦鴈飛時
兵戈未得書生力
草澤偏懷故主思
如意一聲天地裂
淚痕千載濕江灘

留別董西來

客塗相見即相親總是淒涼夢裏人且喜何郎能似舅
不妨綺季未稱臣睢陽城上三生淚無定河邊後死身
惆悵天涯分手處秋高一鴈落江津

冬夜獨坐作

有客挑燈夜賦詩魂銷雨雪歲寒時黔婁私謚稱康子
文舉人推是大兒落日江邊勾踐國春風湖上岳王祠
尚然老健堪容與耐取青松百尺枝

張昉二首

昉字于東一字匏客商丘人崇禎丙子舉人有

匏客遺詩

詩話匏客多憂生之
嗟其詩原出老杜

晚行

客路寒山暮居人各掩門
荒城餘古驛落日滿前村
世亂家難料身微命敢論
烽烟回首處原野已黃昏

武陵原

遠害當年早深山共卜居家耕
無賦地人讀未焚書父

老衣冠古兒孫禮法疎咸陽三月火不到野田廬

徐之瑞 七首

之瑞字蘭生臨安人崇禎丙子舉人有橫秋堂

稿

詩話孝廉熟精文選五言古致
紛敷近體效韓冬郎極其綺靡

行路難

太行北上雪刺天黃河西渡水塞川狗屠擊筑各已老
咸陽逐客還游燕烏丸夜守龍廬戍越鳥朝棲日南樹

長槍大槊取通侯安用蓬門事章句

雞鳴嶺

披榛陟山椒
輶推馬盤桓
歷險未云疲
逶迤入雲端
仰探巖谷偏
俯視井邑殘
千峰列遠戍
兩崖壯重關
垂蘿蔓幽壑
怪松支危垣
灌木鬱樛參
哀風嘯叢萑
乘墉或失恃
務德誠所難
蟋蟀在牀下
我生詎遑安
勞勞多苦辛
惻惻起悲歎

五十初度戲作一萬八千日歌

翔鳥夾日東方起
螭蛄大笑蜉蝣死
聽我萬八千日歌
請從握算軒轅始
我生不逢唐與虞
我死不返鴻濛初
以尻為輪神為馬
手抉灑氣還虛無
虎頭燕頤玉闕路
墮地儒冠脫相誤
將軍海外御樓船
坐看蚩尤蔽妖霧
璇題兩角開明堂
左日右月魁中央
豐隆屏翳伏不動
弧矢一星猶射狼
布衣憔悴夷門客
瞋目操椎大梁陌
少年躍馬氣凌雲
怒血衝冠髮先白
南修蛇北封狐魂
乎歸來不可處上
乘白蜺游天都
洞房繚繞明華燭
珠

綴文軒網交綠娛光繇眇睇層波半醉雙鬟抱絲竹北
斗挹漿醪且清玉妃起舞吹鸞笙百壺一榼馬足算小
臣再拜觴千齡天門朝開誅蕩蕩劔佩雞鳴劇相向已
看恨骨委蓬蒿安用黃金鑄形像二十四氣黃鐘吹三
萬六千璇璣推元化回環貫金石丹宮玉齒生寒灰平
生豪健屠龍手蹭蹬麒麟落牛後夢中滄海幾回更勸
爾長星一杯酒

春游詞 四首

西山松柏翠成林十里橫塘水路深
鷓鴣鴛鴦莫相妒
荷花香處結同心

檀槽低攏小鸞青金鴈斜飛玉手輕
弟子三吳零落盡
橋頭弦索最知名

山頭擊鼓賽金錢檣上飛鳥散舞筵長
記迎神送神處
石湖沙背泊郎船

龍膏千炬繞芝楹銀鑰初收玉漏傾
夜冷不禁羅袖薄
雙鬟炙火更吹笙

巢鳴盛 一首

鳴盛字端明嘉興人崇禎丙子舉人有永思草

堂集

詩話孝廉肥遯深林絕迹城市時羣盜四起鏐鐵銀鏤之器無得留者於是遠屋種匏小大凡十餘種長如鶴頸纖若蜂腰杯杓之外室中所需器皿莫非匏者遠邇爭倣之槁李匏樽不蹊而走海內孝廉作長歌咏焉茲錄五言一律剖心剖垢蓋自喻也

題匏杯

回也資瓢飲悠然見古風剖心香自發剖垢力須攻不

識金銀氣何知陶冶工宣尼疏水意樂亦在其中

劉永錫 二首

永錫字欽爾魏縣人崇禎丙子舉人選長洲儒學教諭署崇明縣事庭無留獄有洹水遺詩

詩話洹水至性之士兵後隱居相城有大吏強之仕袒裼疾視曰我中原男子年二十渡漳河登大伾躍馬鳴鞘兩河豪傑誰不知我奈何欲見辱邪取壁上所挂劍欲自剄門下抱持之得解既而女妻相繼餓死子為盜所傷亦死久之洹水没其弟子徐晟陳三島等經紀其喪葬之

虎丘
山塘

揚子刺船歌

白日墮兮野茫茫家千里兮來遠方壯士何時兮歸故鄉

鼓枻歌

溯彼中流兮采其荇矣思君與父兮有懷靡竟矣身為
餓夫兮天所命矣中心殷殷兮涕斯迸矣

明詩綜卷七十三